

NAFARROAKO AURREKONTUAK. Oraindik ez dute zehaztu noiz hasi



JOKE LACALLE

Nuria Iturriagagoitia, Nafarroako Gobernuako bozeramailea.

Aurrekontuak hitzartzeko PSNren nahia akordioetan islatzea espero du UPNk

Aurtengoa zertan ez den betetzen azaltzeko eskatu die sozialistei

Erredakzioa | IRUÑEA

Nafarroako Gobernuaren iritziz «berri ona» da PSNk hurrengo urteko aurrekontuak hitzartzeko azaldu duen «prestutasuna». Nuria Iturriagagoitia UPNko Gobernuako bozeramailearen aburuz, sozialisten hitzartzeko nahia «akordioetan gauzatzea» litzateke hurrengo pausoa.

«Benetako hitzarmenetan gauzatzea espero dut; eta, beti bezala, UPNren Gobernuak sinatutakoa beteko du», adierazi zuen Iturriagagoitia, atzo, Iruñean eskaini prentsaurrekoan. Oraingoz, bi aldeek ez dute elkarriketa egutegirik jarri. Izan ere, Nafarroako Gobernuak sozialisten nahia «komunikabide-

en bitartez» jakin duela adierazi zuen Iturriagagoitia.

UPN hasia da CDNrekin 2002ko aurrekontuak negoziatzen. Alta, Nafarroako egoerari buruz joan den ostegunean eta ostiralean egin zen bi eguneko eztabaidaren ondoren esan zuten sozialistek negoziazio elkarriketak hasi nahi zituztela. Beraz, litekeena da UPN eta PSN aste honetan biltzea.

Ildo berean, Nafarroako Gobernuako bozeramaileak gogoratu zuen Parlamentuko eztabaidan UPNrekin aurrekontuak hitzartzeko asmoa «zalantzan» jarri zuela PSNk. Hori dela eta, larunbatean, sozialisten Batzorde Eragileak Iruñean egindako bileran, aurrekontuak UPNre-

kin adosteko onespina lortu izana «albiste ona» da erregionalistentzako.

«Gobernuak hitzartzen duena bete egiten du»

Bestalde, PSNk bilera berean 2001. urteko aurrekontu partidak ez direla betetzen ari leporatu zion UPNko Gobernuari. Iturriagagoitia «esandakoak frogatzeko» eskatu die sozialistei. «Gobernuak hitzartzen duena bete egiten du», adierazi zuen, eta sozialistei galdegin zien UPNk zer ez duen bete zehazteko. «Gastuak gauzatzeak prozesu bat darama, eta 2001. urteko abenduan zer ez dugun bete esatea gustatuko litzaidake», adierazi zuen.

NAFARROA. Parte-hartze Fondoa %15 igotzea eskatuko du Parlamentuan

Udalentzako diru gehiago eskatuko du Batasunak

Erredakzioa | IRUÑEA

Nafarroako Tokiko Ogasunen Parte-hartze Fondon diru kopuruak eta banaketa egiteko formulak aldatzeko ebazpena aurkeztuko du bihar Batasunak, Parlamentuan. Ekimenak udal eta kontzejuek dituzten finan-

tzaketa arazoak moldatzea du helburu.

Shanti Kiroga Batasuneko parlamentariak gogoratu du azken sei hilebeteotan lau proposamen aurkeztu direla Tokiko Ogasunen inguruan, eta bi atzera bota direla. Beraz, egungo legedia aldatu egin behar dela

uste du. Gaur CDNrena eztabaidatuko da batzordean. CDNk iradoki du parte-hartze fondoa iragan urtean baino %8 gehiago izatea: 29.000 milioi pezeta gehiago. Batasunak uste du ez dela nahikoa, udalek eta kontzejuek dituzten arazo «estruturalak» moldatzeko. Hala, kopurua %15 igotzea proposatuko du biharko plenorako aurkeztuko duen ebazpenean; hau da, 52.200 milioi gehiago.

DIRU BEREIZIEN AUZIA. Salaketak ukatu zituen

Poliziako zuzendari ohiak aparteko diru saririk ez zuela jaso deklaratu du

Agentziak | MADRIL

Espainiako Poliziako zuzendari ohi Jose Maria Rodriguez Coloradok diru bereizietatik beretzat aparteko gainsaririk jaso izana ukatu egin zuen atzo, Madrilgo Entzutegi Probintzialean eginitako deklarazioan.

Diru bereizien auzian, ustelkeriaren aurkako fiskal Alejandro Luzonek galdekatu zuen Poliziako zuzendari ohi, eta Guardia Zibileko zuzendari ohi Luis Roldanek eta Rodriguez Coloradoren lagun Mariano Jaquototek —Real Madrileko presidentorde zendua— jaso izan zituzten dirutzen «antzekotasunak» nabarmendu zituen: kopuru berak, egun beretan, eta, sarri, bata bestearen hurrengo txekeak. Jaquototen Bankinterreko kontuan 1988 eta 1991 artean 84 milioi pezeta sartu zirela adierazi zuen fiskalak, diru bereizietatik, Coloradoren gainsaria ezkutatzeke asmoz.

Rodriguez Coloradok ukatu zuen diru sarrera horiek berak egin zituenik, eta esan zuen Jaquototek hainbat aldiz Barne Ministerioarentzat lan egin zuela, eta horregatik

jaso zuela dirua. Ordainketak, gainera, Estatuko Segurtasun Idazkaritzak egin zituela deklaratu zuen.

Jaquototen kontutik Rodriguez Coloradok berak bi ordainketa egin zituela onartu zuen, Nissan Patrol bat erosteko, eta haurren eskolak ordaintzeko. «Mailegu bat» izan zela esan zuen.

Julian Sancristobal eta 12 milioi pezetak

Estatuko Segurtasunerako idazkari ohi Julian Sancristobalek berretsi egin zuen atzo Jose Barrionuevo Barne ministro ohiak 12 edo 13 milioi pezeta eman zizkiola eskura, kargua utzi zuenean. Salaketa ostegunean egin zuen Sancristobalek lehen aldikoz, eta, Barrionuevok, salaketa ukatzeaz gain, folio neurriko kartazal batean hainbeste diru sar daitekeenik auzitan jarri zuen. Bada, epaimahaiari erakutsi nahi izan zion Sancristobalek hori posible dela.

1986ko dirutan 5.000 pezetako bilete bat eta neurri bereko 2.400 paper puska eramane, eta kartazaletik ateratzen zituen epaitegian, milioi bana pezetako 12 pilotan.

ESTRADIZIOA. Prozedura hasiko da ostiralean

Elkartasuna areagotu da Quebec-eko errefuxiatuekin

Erredakzioa | DONOSTIA

Eduardo Plagaro eta Gorka Perea euskal errefuxiatuen aldeko elkartasuna areagotzen ari da Quebec-en. Bi gazte horiek Canadako Poliziak atxilotu zituen ekainean Montrealean, Espainiako Gobernuak estradizio eskaera egin ondoren. Geroztik espetxean daude. Hain zuzen, estradizio prozesuaren hasiera saioa ostiralean izango da.

Bitartean, Quebec-en ezauna egiten ari da bi euskal herritarren egoera, eta urriaren 1etik 5era elkartasun jardunaldiak egin dituzte. Quebec-eko zenbait aktore, abeslari, eta zinema gidoilari parte hartu dute ekitaldietan. Ekitaldi horietan Plagaro eta Perearen tortura testigantzak entzun ahal izan dira aktoreren ahotsetan. Antolatzailen artean zegoen, esa-

terako, Denis Trudel aktore ezaguna.

Urriaren 5ean ikastetxe batean hitzaldi bat izan zen gaiari buruz, eta Isabel Demarais eta Iñigo Elkoro, Plagaro eta Perearen abokatuek parte hartu zuten gazteen egoera juridikoa azaltzeko.

Montrealean elkartasun batzordea eratu dute. Besteak beste, Euskal Herrira bisitaldi bat prestatzen ari da batzorde hori. Halaber, ostiralerako elkarretaratzea antolatuko dute Justizia jauregiaren aurrean. Errefuxiatu horien aterpetzearen aldeko sinadura biltzea ere egiten ari dira, eta dagoeneko 1.500 sinadura bildu dituzte, tartean bertako jende ezagun ugari.

Plagaro eta Perea 1997an joan ziren Quebec-era bizitzera, eta aterpetzea eskatu zuten, baina oraindik prozesu hori ez da amaitu.